

## 2 Jon

### Naoa itəm tatol kəiu lan itəm Jon təməte Nəghatən əkuəkir rəha naoa u 2 Jon

**?Pah təməte naoa u?** Aposol Jon təməte naoa u.

**?Təməte tatuwin kəm pah?** Təməte tatuwin kəm pətan kit rəha niməfak. Məto okəm-naka nəghatən u “pətan,” nıpətin təmə niməfak kit. Kən “nenətin min,” ilat netəmim rəha niməfak. Jon təməte nəghatən min əh, tahmen e nəghatən kit tatəhluaig. Təsolkəikəən məmə otən-iarəp nərgin məto-inu, kol mətan netəmim neen kotal nolən rat elat.

**?Nəmegəhən tahro nulan nian təməte?** E nian əh, iəgətun min tepət kotaliwək e ikin pisin pisin min. Netəmim itəm kəmotəto nəghatən rəhalat kinotos-ipən nagwənən kəm ilat. Kən motos-ipən ikin min rəha napilən, kən motasitu elat. Məto iəgətun eiuə min koatuwin əpnəpin min o niuw-rəkisən netəmim rəha niməfak məmə okotapəs nəghatən pahrien.

**?Təməte naoa u o naka?** Nian iəgətun eiuə min kotuwa, Jon təmə netəmim itəm kota-hatətə e nəghatən pahrien rəha Uhgın, okotəkəike kapəs iəgətun eiuə min əh, kən motapəs nolən ne nəgətunən rəhalat, kən məsotasituən elat. Məto Jon tolkeike məmə netəmim rəha niməfak okotəkəike kolkeike netəmim rəha niməfak. Inu nalpəkəuən rəha Uhgın.

*Nətuounən*

1 Naoa u rəha elta tatuwin kəm pətan Uhgın təmitəpun\* ne nenətin mın. Nıpahrienən məmə iakolkeike pik itəmat. Məto sənəmə io pısin əm iakolkeike itəmat, məto netəm mın un rafın itəm kotıtun mın nıpahrienən,† kotolkeike itəmat.

2 Kən ekotolkeike itəmat, məto-inun o nıpahrienən itəm tətatıg e nıkitat‡ kən otatıg lılın e nıkitat.

3 Pəs Tata Uhgın ne Nətin İesu Kristo okuawte-in rəhalau nəwırən, ne nasəkitunən, ne nəməlinuən kəm kitat e nıpahrienən ne nolkeikeən.

*Kitat okotətu-pən nəghatən pahrien mın*

4 Nıkkik təmagien asol nian eməplan nenətim mın neen kotaliwək e suatıp rəha nıpahrienən,§ tahmen əm məmə inun, Tata Uhgın təmən mihin kəm kitat məmə kotəkəike kol.

5 Kən roiu əh, wınık, io esətəən nəghatən wi kit kəm itəmat, məto itəm əm un kınotəto rəkis e nətuounən.\* Kən iakatətapəh məmə okotol əm nolkeikeən kəm kitat mın.

6 Kən nolkeikeən u, nıpətin u nolən nəwıa Uhgın. Kən in tatən məmə kitat okotəike motətəp suatıp rəha nolkeikeən, tahmen əm məmə inun nəmotətə e nətuounən.

7 Məto-inu iəgətun eiua mın tepət koatan e nətueıntən.† İlat kəsotahatətəən məmə İesu in Kristo itəm Uhgın təmən məmə otahl-ıpa,‡ in təmuwa etəmim pahrien, e nıpətin pahrien.§ Etəm tol nəhlan in ieiua kən in tıkimır rəha Kristo.\*

\* **1:1:** 1 Pita 5:13 † **1:1:** Jon 8:32 ‡ **1:2:** Jon 14:17 § **1:4:** 3 Jon 1:3,4 \* **1:5:** 1 Jon 2:7 † **1:7:** 1 Jon 4:1 ‡ **1:7:** 1 Jon 2:22; 4:2,3 § **1:7:** Jon 1:14 \* **1:7:** 1 Jon 2:18

8 Tol nəhlan, oatəto itəmat məmə okəsətətipən nətouən rəhatəmat, pəs itəmat onəkotos nətouən rafin lan, məto-inun itəmat emotol pik wək etəmat.†

9 Okəmə etəm tatətu-pən atip əm nəgətunən kit rəhan e nəgətunən rəha Kristo, kən məsatəkəikeən e nəgətunən rəha Kristo,‡ nolən rəhan tatəgətun məmə Uhgın təsatigən e nıkin. Məto etənim pah itəm tatəper-ipən əskasik e nəgətunən rəha Kristo, in tatos Tata Uhgın ne Nətin ilau kərən e nıkin.§

10 Okəmə suah kit tuwa ron ik, kən məsənən nəgətunən ətuatip rəha Kristo, asitən in muwın imam ikin, məsənən “təwır” kəm in.\*

11 Məto-inu etəm tatən “təwır” kəm in, tətəsitə lan matol suatip o rəhan nəgətunən rat.†

### *Namnun nəghatən*

12 İatos nəghatən tərət məmə ekəte kəm itəmat, məto esolkeikeən məmə ekəte e məpepe ne pen. Məto nıkkik tatəht pik mə ekuwa mətag itəmat kən məghat ətuatip kəm itəmat e nıganəmtitəmat, pəs nəgienən rəhatat otərıoah.‡

13 Nenəti piam§ itəm Uhgın təmıtəpun, ilat koatən təwır kəm ik.

---

† **1:8:** 1 Kor 3:8; Hip 10:35,36; 11:26    ‡ **1:9:** Jon 8:31    § **1:9:** 1 Jon 2:23    \* **1:10:** Rom 16:17    † **1:11:** 1 Tim 5:22    ‡ **1:12:** Jon 3:29    § **1:13:** Pia pətan əh in nıməfak kit mın, Jon in tətətig ikin əh. Kən nenəti pian u, ilat nımanin rəha nıməfak əh.

**North Tanna New Testament**  
**The New Testament in the North Tanna Language of**  
**Vanuatu**  
**Le Nouveau Testament dans la langue du Nord Tanna**  
**de Vanuatu**

copyright © 2010 Wycliffe Bible Translators, Inc.

Language: North Tanna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 18 Apr 2025 from source files dated 31 Aug 2023

46e9a2b5-26b8-5301-a079-623f3a20ef8b